

Don Juan d'mon-keûr !

Comédie en 1 acte de Joëlle Delahaut et Philippe Decraux

Personnages

- Valentin +/- 17 ans
- Nathalie +/- 16 ans, sœur de Valentin
- Margot +/- 12 ans, sœur de Valentin
- Léa +/- 15 ans, sœur de Valentin
- Vanessa +/- 16 ans, petite copine de Valentin
- Christelle +/- 16 ans, petite copine de Valentin

Décor

La pièce se déroule dans un salon (agencement au choix du metteur en scène). Il faut au minimum :

- un canapé
- une télévision
- une table de salon
- une armoire ou une étagère avec quelques bouteilles

Droits d'auteur

SABAM, rue d'Arlon 75-77, 1040 Bruxelles
SACD, rue du Prince Royal 87, 1050 Bruxelles

(Au lever du rideau, Margot et Léa son en pyjama, vautreées dans le canapé. Elle regardent la télévision en mangeant des chips et en buvant du coca.)

Scène 1
Valentin, Margot, Léa

Valentin : (entrant) Alèz les fîyes ! Il est tims asteûre d'alér vos couchât !

Margot : (sursautant) Couchât ?

Léa : In vèrdi ?

Margot : A sèt' eûres et d'mîye ?

Valentin : C'n'est nèn l'momint d'fèr dèl powésîye ! Ramassèz vos clic' èyèt vos clac' et... « Au lit on dort »...

Margot : Mins pou qui ç'qui vos vos pèrdèz, vous ?

Léa : Oyi, vos n'astèz nèn l'chèf, droci !

Valentin : Papa et maman sont st-èvôye pou l'wékèn' et dji seus l'pus vî. Adon, c'est bèn mi qu'est l'chèf !

Margot : In chèf a rén, oyi !

Valentin : Dj'é prom'tu a maman qu'vos-irîz vos couchât timpe tous les djoûs. Adon, vos-avèz trwès munûtes pou yèsse dins vo lét, sinon...

Margot : Sinon qwè ?

Léa : Vos-alèz nos donér ène pètèye ?

Margot : C'est l'vré, çoula ! Qwè ç'qui vos-alèz nos fèr ? Nos djonde azârd ?

Léa : Nos donér ène pûnicion, come a les p'tits-èfants ?

Valentin : Riyèz, riyèz... mins dji poureûs ètout racontér saquants-afêres aus parints...

Margot : Si qwè « saquants-afêres » ?

Valentin : Par ègzimpe... (à Margot) Qu'vos-avèz signî vous-min.me vo n'intérogacion d'calcul l'samwène passéye tél'mint au'vos pwints èstît bias... Eyèt vous (à Léa) qu'vos avèz skètè l'pus bia vase di maman et qu'vos lî avèz racontè qu'c'èsteût l'tchat qui l'aveût fèr tchér !

(Les deux filles sont consternées)

Margot : Lèbon, lèbon... Nous, tout ç'qu'on vouleût, c'èsteût d'alér couthî ène dèmi-eûre pus taurd...

Valentin : L'idéye n'est nèn mwéche après tout... C'est qui... dj'é ètout prom'tu a maman qu'i gn-areût pont d'dèlûje droci... Dji vos lèyèz ène dèmi-eûre di pus... Come ça, vos-arèz l'timps d'fèr les bidons divant d'alér vos couthî !

Léa : Mins nous-outes, nos n'avons rén prom'tu a maman !

(D'un geste du doigt, Valentin leur indique fermement la sortie. Les deux filles sortent en râlant et en laissant chips et verres de coca sur la table.)

Scène 2 : Valentin

Valentin : Asteûre qu'èles-ont disbarassè l'plantchî, dji m'va d'alér prinde in bon bin pou m'aprèstér a m'swèréye...

(Il fait mine de quitter la pièce puis se ravise.)

Valentin : Mins d'avant ça, dji m'va prinde ène saqwè d'fôrt... Papa dit toudis qu'i gn-a rén d'tél' pou s'mète en trin !

(Il va vers le bar et se sert un grand verre de whisky.)

Valentin : Après tout, i parèt qu'c'est fèt avou des plantes, ça n'sareût nèn m'fèr du mau...

(Il boit un grand coup et manque de s'étouffer, il tousse, etc...)

Valentin : Ah ça, pou tchaufér, ça tchaufe !

(Il contemple le verre à moitié vide puis...)

Valentin : Mins come papa dit ètout, i faut toudis alér djusqu'au d'bout d'ses-èfôrts !

(Et il vide le reste du verre. Tandis qu'il boit, Nathalie fait son entrée... Surpris, Valentin dépose son verre en catastrophe.)

Scène 3 : Valentin, Nathalie

Valentin : (s'étranglant) Qwè ç'qui vos f'yèz là, vous ?

Nathalie : (ironique) Dji d'meure droci, savèz... Vos n'vos rap'lèz pus ?

Valentin : Ca, dji l'sés bén ! Dji v'leûs dire : qwè ç'qui vos f'yèz "d'djà" là ? Dji pinseûs qu'vos d'vîz d-alér au cinéma avou vo galant...

Nathalie : Oyi, mins dj'é candjî d'avis !

Valentin : Pouqwè ? Vos vos-avèz disputè ?

Nathalie : Non fét ! Mins c'vaurén-là n'aveût nén d'djà l'premî euro pou payî m'place au cinéma...

Valentin : Mins si c'n'est qu'ça, dji pous vos l'payî, mi, l'place... Tènèz... (il sort un billet de sa poche) Dîj' euros, ça ira ?

Nathalie : C'est bén djinti d'vo paurt mins... dji dwès r'fûzér ! C'est st-ène kèstion d'principes ! Dji seus l'djon.ne fîye, il est l'djon' ome... C'est st-a li d'payî m'place !

Valentin : Qwè ç'qui c'est d'ça pou des-idéyes d'ènwère ? Vos n'avèz jamés ètindu pârlér du "féminisme", vous ? D'l'égalté des sekses ?

Nathalie : C'est bon pou les-outes, tout ça ! Pour mi, ène feume, c'est st-ène feume et in'ome, c'est st-in'ome !

Valentin : Mins a mi, ça n'fét nén mes-afêres... Bén qui... Tout compte fét, c'n'est nén pus mau qu'vos fûchîje rintréye pus timpe...

Nathalie : Pouqwè ? Dji vos manqueûs d'djà ?

Valentin : Oh non fét, ça n'pout mau ! Mins les deûs tchawètes sont dins l'cujène pou l'momint en trin d'fêr les bidons et i n'faureût nén qu'ça trin.ne trop longtims... Vos-alèz lyeû boutér in côp d'mwin !

Nathalie : Et pouqwè ç'qui vos n'alèz nén vous min.me lyeû boutér in côp d'mwin ?

Valentin : Pac'qu'in'ome, c'est st-in'ome et qu'ène feume, c'est st-ène feume ! C'est bén ç'qui vos v'nèz d'dire i gn-a nén cénq munûtes !

Nathalie : Et vos pinsèz qu'ça va d-alér come ça, vous ? Qu'vos-alèz m'donér des ôrdes et qui dji m'va vos choûté come in p'tit tchén ?

Valentin : C'est st-a dire qui... papa et maman n's'rînt nén fôrt contints d'aprinde qui, l'samwène passéye, vo galant est d'meuré djusqu'a mèniût dins vo tchambe...

Nathalie : Vos n'ôz'rîz tout l'min.me nén...

Valentin : Mi, dins ces cas-là, dj'é tous les courâdjès...

Nathalie : Ah mins ça... ça va s'payî !

Valentin : Alèz, ravalèz vo ratchon ! Pac'qu'asteûre, il est grand timps qu'dji vâye prinde m'bin...

Nathalie : Matcho qu'vos-astèz !

Valetin : L'place des feumes, c'est st-a l'cujène !

Nathalie : Landru ! Vos mèl pây'rèz, dji vos l'djure ! (Et elle sort en râlant.)

Scène 4 : Valentin

Valentin : Et co yène wôrs des pîds ! Asteûre, dji m'va d-alér m'èscurer, mète du sint-bon èyèt m'fêr tout bia pou m'chérîye...

(Il fait de nouveau mine de sortir, fait demi-tour et se sert un autre whisky qu'il avale en deux temps trois mouvements.)

Valentin : Après tout, on n'va jamés su ène djambe, en'do ?

(Et il sort.)

Scène 5 : Léa, Margot, Nathalie

(Léa, Margot et Nathalie entrent toutes les trois.)

Nathalie : L'vaurén, i nos-a bén yeû mins tout çoula, i nos l'pây'ra !

Léa : Mins pou qui ç'qui s'prind, hon, c'ti-la !

Margot : On a bén l'drwèt d'profitér dèl maujone come li quand papa et maman n'sont nén là !

Léa : Tout çoula pac'qui mossieû vout d'meurér tout seû avou s'coumère...

Margot et Nathalie : Qwè ?!

Léa : Bén oyi ! Dji l'é ètindu t'taleûre : i lyî a téléphoné pou lyî dire qui les parints èstît st-èvôyes, qu'il asteût tout seû et qu'i l'inviteût a v'nu passér l'swèréye droci.

Nathalie : Vos d-astèz sûre ?

Léa : Bén oyi qu'dji d-è seûs sûre ! R'wètèz, s'téléfone est d'meuré là... Et dji l'ètinds co : (Elle imite Valentin.) « Vanessa chérîye ! Mes parints n'sont nén là audjourdû et dji seus tout seû al maujone... Ca m'f'reût tél'mint pléjî

si vos astîs là a costé d'mi... Vos v'lèz bén v'nu ?... Oh, mèrci Vanessa chériye... Dji seus tél'mint binauje... »

Nathalie : Vanessa ? Il a dit Vanessa ?

Léa : Oyi. Dj'é dins l'idéye qu'c'est come ça qu'èle si lome, s'coumère ?

Nathalie : Non fét, djustumint ! S'coumère, èle si lome Christelle !

Margot : Il a p'tète candjî ?

Nathalie : Ayèr, il asteût co toudis avou Christelle dins tous les cas ! Dji les-é vèyûs...

Léa : Il a kék'fîye deûs coumères, li ?

Margot : Il est co pî qu'dji nêl pinseûs ! Qué coureû a fîyes !!

Nathalie : Au contrère, les fîyes, c'est tout bon pou nous-outes... Dji pinse qui dj'é trouvé in plan pou nos r'vindji toutes les trwès ! Eyu ç'qui l'est, s'téléfone ?

Léa : Qwè ç'qui vos-alèz fér ?

Nathalie : Vos-alèz vîre...

(Elle prend le GSM de Valentin et compose un numéro.)

Nathalie : Alô ? Christelle ? Bondjoû ! C'est Nathalie, droci, l'cheur da Valentin. Oyi, ça va bén èyèt vous ? Dijèz, Christelle, nos parints sont st-èvôyes pou l'wékèn' et mes cheurs èyèt mi, nos-alons fér ène sôrtîye intrè fîyes... Seûl'mint, nos-avons 'ne miyète mau no keûr pou Valentin qui va d'meurér tout seû droci... Vos n'pourîz nén v'nu passer l'swèréye avou li ? Ca lyî f'reût tant pléjî èt ène bèle surprîje au d'zeû du martchî... C'est possipe ? vos s'rèz là dins dî munûtes ! C'est formidâbe, Christelle ! Nos vos ratindons... (Elle raccroche.)

Nathalie : Et d'yène ! A qué n'eûre est-ç'qu'il a dit d'passér a Vanessa ?

Léa : Vièz les wit' eûres et d'mîye...

Nathalie : Tout djuste, èles vont arivér toutes les deûs èchène !

Margot : Ouh ! Ca va yèsse l'corida, droci !

Léa : Eles vont l'mindjî tout crû !

Nathalie : Oyi... Mins asteûre, nos d'vons nos-organizér : vous, (A Léa) vos-alèz montér l'gârde al fènièsse... I faut fèt intrér les fîyes sins qu'èles ni duv'nut sonér sinon ça va donér l'alèrte au grand via! Eyèt vous, (à Margot) vos vos postèz a costé dèl sale di bin... Si vos-ètindèz du brût ou qu'vos pinsèz qu'i va vudî, vos diskindèz quate a quate nos prév'nu! Compris ?

Léa et Margot : A vos-ôrdes, chèf !

(Elles gagnent leur poste.)

Scène 6 : Nathalie

Nathalie : Bon, asteûre qui tout est st-arindjî, dji m'va r'mète ène miyète d'alûre droci... Ca mèt'ra l'aute coquia d'boûne umeûr et insi i n'si dismèfiy'ra nèn...

(elle débarrasse la table des verres et des chips qu'elle reporte à la cuisine. Elle réapparaît très vite.)

Scène 7 : Nathalie et Léa

Léa : Nathalie ! Yène des deûs fîyes vént d'passér l'bârière !

Nathalie : Dimeûrèz calme, Léa ! Vos-alèz l'fêr rintrér paujèr'mint droci et quand l'aute ariv'ra, vos f'rèz l'min.me avou lèye. D'acôrd ?

Léa : Oyi, Nathalie ! Dj'é compris ! (Elle sort et reparaît aussitôt avec une jeune fille.)

Scène 8 : Nathalie, Vanessa, Léa

Nathalie : Ah, bondjoû Vanessa !...

Vanessa : Bondjoû...

Nathalie : Oh, mins dijèz... dji vos r'mèts asteûre : vos astèz l'fîye qui boute al pizzéria dèl Grand-Ruwe ?

Vanessa : Oyi, c'est bén mi...

Nathalie : Ah bén, dji comprinds asteûre ! Ca fèt des samwènes qui dj'vos wès donér des rawètes di fromâdje a m'frère, sins qu'i pâye ène djigue ! Dji m'dimandeûs Bén c'qu'il aveût fêr pou méritér çoula...

Vanessa : I l'mérite Bén, savèz... Il est tél'mint djinti...

Léa : Faut d-alér râde pou l'dire !

Vaness : Et avou ça, il est tél'mint sérieûs ! Toudis a l'eûre aus z'è rendèz-vous, romantique, atincioné...

Léa : Dijèz, Vos astez bén sûre qui c'est no frère qui vos con'chèz, vous ?

Vanessa : Oyi... enfin... i m'chène a vire dins tous les cas...

Nathalie : Oyi, oyi, c'est bén li... Mins, dijèz Léa, vos n'avèz nèn ène saqwè a fér, vous ?

Léa : (se sauvant) Oyi, oyi, Nathalie !

Scène 9 : Nathalie, Vanessa

Vanessa : Et bén ! Vos 'nn'avèz d'l'autorité su vo cheur !

Nathalie : C'est pus râde qui nos nos-ètindons bén et qu'èle vout m'fér pléjî...

Vanessa : Et avou Valentin ? Vos vos-ètindèz bén ètout ?

Nathalie : Candjons d'sudjèt, si vos v'lèz bén... Ca vaureût mieûs !

Vanessa : C'est qui... c'est st-ène saquî d'bén, savèz, vo frère !

Nathalie : Dji vous bén vos crwère, vous !

Scène 10 : Nathalie, Vanessa, Léa, Christelle puis Margot

(Léa entre suivie de Christelle.)

Nathalie : Ah, bondjoû Christelle !

Christelle : Bondjoû, Nathalie...

Nathalie : Vos d-è f'yèz 'ne drole di tièsse...

Christelle : C'est qui dji seus st-ène miyète sbarée d'vos vire Léa èyèt vous. Dji pinseûs qu'i gn-areût nulu droci... Enfin, dji pinseûs qu'i gn-areût qui...

Nathalie : (lui coupant la parole) Ah ça ! Vos n'avèz nèn co vo compte di surprîjes, m'pètite Christelle...

Christelle : Qwè ç'qui vos v'lèz dire ?

Nathalie : Pou n'nén fér trop long : Christelle, dji vos prézinte Vanessa, l'coumère di no frère... Vanessa, dji vos prézinte Christelle, l'coumère di no frère...

Christelle : Vos-avèz deûs frères ?

Léa : Pou fér co pu simpe : (Elle fait les présentations.) Vanessa, l'coumère da Valentin. Christelle, l'coumère da Valentin !

Vanessa : Dji n'comprinds nèn...

Léa : No frère a deûs coumères : vous èyèt vous !

Christelle et Vanessa : Nén possipe !??

Christelle : (A Vanessa.) Vos m'avèz scroté m'galant !

Vanessa : (A Christelle.) Mins dji n'é rén scroté du tout, mi ! Valentin èyèt mi, c'est st-ène vréye istwêre d'amoûr...

Christelle : Ene istwêre d'amoûr ? Tu va vîre ça, ène istwêre d'amoûr...

(Les deux filles commencent à se quereller bruyamment, les mots « rosse », « gârce », « voleûze »... fusent dans la dispute.)

Nathalie : Ca sufit, vous deûs !

(Les deux filles s'arrêtent net.)

Nathalie : Vos n'avèz nèn compris qui l'coupâbe dins c'n-afêre-ci, c'est Valentin ?

Vanessa : Ele a rézon ! Nos f'rîs bran.mint mieûs d'cachî après ène solucion pou s'irvindjî èchène pus râde qui d'nos cachî mizère !

Nathalie : Djustumint, dj'ê é d'djà pinsé !!

Léa : Et c'est pou çoula qu'on vos-a fét v'nu droci èchène... Alèz, Nathalie : dijèz lyeû vo n'idéye...

Nathalie : Et bén v'là...

(Les filles se regroupent et Nathalie explique son plan à voix basse.)

Nathalie : Et adon ? Qwè ç'qui vos d-è pinsèz ?

Christelle : L'idéye est boûne ! Dji pinse qu'on va Bén s'amuzér !

(A ce moment, Margot arrive en courant.)

Margot : Atincion ! Il arive !

Nathalie : Alèz, chakeune a s'posse !

(Toutes quitte la pièce sauf Vanessa.)

Scène 11 : Vanessa, Valentin

Valentin : (entrant) Vanessa ! Qué boûne surprîje ! Il est d'djà wit' eûres et d'mîye ?

Vanessa : Oyi, m'chéri ! Dj'èsteûs tél'mint d'su des tchaudès bréjes di vos r'vîre...

Valentin : Oh, mi ètout, m'pètit lapén ! Mi ètout ! Dji seus binauje come in bossu ! Hic ! (Il a un hoquet.) Vènèz, achîdèz-vous là, dins l'canapé èyèt mètèz-vous a vo n'auje...

(Vanessa s'assied, déposant son sac sur la table.)

Vanessa : Dji sins qu'nos-alons passér ène boûne swèréye, rén qu'nous-autes deûs...

Valentin : Mi ètout, dj'èl sins, m'pètit keûr... Hic !

Vanessa : Ca n'va nén, Valentin ? I m'chène qui vos f'yèz bén des droles di brûts...

Valentin : C'est d'vos vîre là, Vanessa... C'est l'émocion...

Vanessa : C'est pou ça ètout qu'vos astèz tout roûdje ?

Valentin : Oyi... C'est sûr'mint pou ça ètout...

Vanessa : Vos d'vrîz putète bwère ène saqwè pou vos r'mète d'alûre ?

Valentin : C'n'est nén 'ne mwéche idéye, téns, ca... Dji m'va nos quér deûs vères di coca ! Ca vos va ? (Il se lève et quitte la pièce.)

Scène 12 : Vanessa, Christelle, Nathalie

(Dès qu'il est sorti, Vanessa se précipite vers l'endroit où sont dissimulées les autres. Vanessa doit absolument reprendre son sac.)

Vanessa : Eh vous-autes ! Ca ê est : il est st-èvôye dins l'cujène !

Nathalie : (introduisant Christelle) Alèz Christelle ! C'est st-a vo toûr asteûre ! Et n'roublièz nén tout ç'qui nos-avons conv'nu, en'do...

Christelle : Pont d'danjér, chèf ! Dj'é tout dins m'tièsse !

(Elle prend place au même endroit que Vanessa quelques secondes plus tôt et dépose son sac sur la table.)

Scène 13 : Christelle, Valentin

Valentin : (entrant, un verre de Coca dans chaque main) Mè'vlà r'vènu, m'pètit pouyon... (Voyant Christelle, il stoppe net. Il se met à bégayer.)
Christelle ?? Qwè ç'qui vos f'yèz là ??

Christelle : Comint qwè ç'qui dj'fés là ? Bén, dji vos ratinds, Valentin... Enfin, dji vos ratinds avou m'vêre di coca...

Valentin : Pac'qui l'vêre di coca, ç'asteût pour vous ?

Christelle : C'est c'qui vos m'avèz proposé gn-a deûs munûtes, dins tous les cas ! Yin pour vous èt yin pour mi !

Valentin : Ah bon ?!

Christelle : Vos n'vos souv'nèz pus ? Dji vos-é min.me consyî d'bwère ène saqwè pou vos r'mète d'alûre tél'mint qu'vos-astîz roûdje...

Valentin : (peu convaincu) Dji m'souvéns, en èfèt, dji m'souvéns... Hic !

Christelle : Vos n'avèz nèn l'èr fôrt bén, Valentin... Vos v'lèz qui dj'vos lèye tout seû ?

Valentin : Non fét, non fét... Dimeurèz seûl'mint ! Ca va passér...

Christelle : Dji l'èspère bén ! C'est qui... dj'é bran.mint des projèts pou l'swèréye, savèz mi... Wétèz ! Dj'é mètu èsprès m'pètit pull rôse pou vos fèr pléjî...

Valentin : Vos vos souv'nèz qui l'rôse asteût m'couleûr préférée ? Come c'est djinti...

(Il se penche pour lui faire un bisou. Christelle se dérobe, prend son verre et boit une gorgée.)

Christelle : Oh, l'coca est st-ène miyète tchaud... Vos n'arîz nèn saquants glaçons ?

Valentin : Dji m'va m'okupér d'ça su l'côp... Dj'arive tout d'chête...

(Il prend le verre de Christelle et sort vers la cuisine. Christelle prend son sac et se précipite vers les autres.)

Scène 14 : Christelle, Vanessa

Christelle : Râde, râde ! Pèrdèz m'place ! I n'va nèn taurdjî !

Vanessa : Dji m'dispétche !

Scène 15 : Vanessa, Valentin

(Valentin entre et se fige sur place en voyant Vanessa. Il pousse un cri.)

Vanessa : Valentin ! Qwè ç'qui s'passe ? Vos d-è f'yèz yène di tièsse ?

Valentin : Mi ? Oh, non fét, non fét... C'est tél'mint qu'dji seûs contint d'vos vîre là !

(Il s'assied mais tire une drôle de tête.)

Vanessa : Oh, come vos astèz djinti, Valentin ! Wétèz, dj'é mètu m'pètiti pull bleû pour vous... rén qu'pour vous...

Valentin : Vos vos souv'nèz qui l'rôse asteût m'couleûr préférée ? Enfin, dji vous dire l'bleû ! L'bleû !

Vanessa : L'rôse, l'bleû... C'est pus râde tout vèt' qui vos astèz pou l'momint, Valentin !

Valentin : Vos trouvèz ?

Vanessa : Vos n'avèz vrémint nèn l'èr bén ! Vos d'vrîz putète mindjî ène saqwè asteûre ?

Valentin : Vos-avèz p'tète rézon... Ca vos direût in boukèt d'pizza ?

Vanessa : Avou des-anchwas ?

Valentin : Oyi, avou des-anchwas, si vos v'lèz...

Vanessa : Avou pléjî...

Valentin : Dji m'va vos quér ça...

(Et il sort.)

Scène 16 : Vanessa, Christelle

Vanessa : Alèz, Christelle... et boûn' apétit !

Christelle : Mèrci !

(Vanessa sort en oubliant son sac sur la table. Christelle prend sa place et pose son sac à côté de celui de Vanessa.)

Scène 17 : Christelle, Valentin

(Valentin entre, 2 parts de pizza en mains.)

Valentin : Et deûs boukèts d'pizza, deûs ! (Voaynt Christelle) Oh, mon dieû ! C'a co toudis candjî !

Christelle : Qwè ç'qui vos d'jèz ?

Valentin : Dji pinse qui vos-avèz réson, savèz... Dji n'mi sins nèn bén... I m'chène qui dj'wès des-afêres qui n'faut nèn... Dji n'é pus m'tièsse a mi !

Christelle : Téjèz-vous et achêdèz-vous ! Mindjèz pus râde in p'tit boukèt d'pizza, ça vos pas'ra...

Valentin : (s'asseyant) Dji pinse qui c'est dins m'tièsse qui ça n'va nèn ! Dji comince a piède mes boubounes...

Christelle : (prenant son morceau de pizza) Mins, a propos, Valentin... vos n'avèz nèn dèl d'pizza sins pont d'anchwas ?

Valentin : Mins... i gn-a céng munûtes, c'est vous qui m'avèz d'mandé des-anchwas su vo pizza !

Christelle : Jamés d'la vîye ! Dji n'in.me nèn les-anchwas, dji wès évî les-anchwas !

Valentin : Oh, mins... dji m'î r'trouve pus, mi, dins mes-idéyes... On direût qui m'tièsse va pèter...

Scène 18 : Toutes les filles + Valentin

(Entrée des filles sur la dernière tirade de Valentin, Christelle rejoint le groupe.)

Vanessa : Si èle ni pète nèn toute seûle, nos lyî bout'rons in côp d'mwin...

Valentin : Vanessa ?! Co toudis in mirâje ? C'est l'wiski ! C'est sûr'mint a cauze du wiski ! (Avisant les deux sacs identiques, il les prend en mains.) Ca î est ! Dj'é l'bèrlûwe asteûre ! Oh, mon dieû... Dji sins qu'dji va yèsse malâde...

Toutes les filles : Bén fêt !

Valentin : (s'allongeant dans le canapé) Dji sins qu'dji m'va rinde l'âme...

Nathalie : Et quand vos-arèz fini d'rinde l'âme, gn-a des bidons qui vos ratind'nut ! (Elle lui tend une brosse à vaisselle qu'elle laisse tomber sur lui dans le canapé.)

Margot : Après, gn-ara ètout des poussières a brouch'tér ! (Elle laisse tomber un plumeau à poussières.)

Léa : Et co in p'tit côp d'loque a donér ! (Elle dépose un balai sur lui.)

Nathalie : Asteûre, nos vos lèyons !

Margot : Pac'qu'audjourdû...

Léa : L'place dès feumes...

Vanessa : Ele est st-a l'pizzéria !

Christelle : Avou ou sins-anchwas !

Toutes : Arrivedèrci Don Juan d'mon-keûr !

(Et elles sortent.)

RIDEAU

(sur la musique « Macho Man » de YMCA)